

briff wider zcugebin und haben daz zcu gedechtnüsse in unser statbuch lassen schreiben. Dez zcu bekentnüsse und merer sicherheit, daz wir vorgeschriben rethe und gancze gemeyne arm und reich der stat Czwickaw bey unsern guten truwen alle vorgeschribene stücke und artikel disz briffs vestiglichin halden sullen und wöllen an argelist und an allis geverde haben disen brif vorvestende und gesterket mit unser stat Czwickaw grössem ingesigel, daz wir mit gutem wissen und willen an disen briff haben lassen hengen, der do gegeben ist noch Cristi unsers herren geburt virczenhundert jare darnoch in dem czweyunddreissigsten jare im achten tage noch der heiligen drey könig tage.

*a) über die Zeile geschrieben b) folgt durchgestrichen willen c) folgt durchgestrichen nehist d) folgt durchgestrichen clerlichlich (!) e) folgt durchgestrichen dez f) folgt durchgestrichen czin g) folgt durchgestrichen be h) folgt durchgestrichen werdin 1) Original: Zwickau, Stadtarchiv, Kaland K 5 Nr. 8 (UB Zwickau Bd. I, Nr. 334).*

## 634.

1432 Mai 3

***Der Rat der Stadt Zwickau bekennt, dem Priester Nikolaus Symon Zinsen verkauft zu haben, die dieser dem St. Johannisaltar stiftet.<sup>1)</sup>***

*fol. 105v-106r* Herrn Niclas Symonis. Wisset daz wir mit vorrathe unser eldisten und clugstin vorkoufft habin dem erbern prister und herren Niclas Symonis drey reynisch guldin, dy wir ym alle jar jerlichin eynes in dem jare czinsen reichin und gebin schullen uff sant Walpurgen tage und haben dy gegeben umb 42 gute rynische guldin, also daz ye eyn guldin komet umb 14 guldin und dy ablosunge stet zcu der stat. Actum anno domini etc. XXXII° an dez heiligen creucz tage, als ez gefunden warde.

Wir ratismanne der stat Czwickaw Nicolaus Treütwein, bürgermeister, Jost Paysenkese, Niclas Gürtler, Jacoff Schuster, Niclas Czencker, Heincz Schelle, Hans Czachwicz, Johannes Lasan, Claus von der Hart, Niclas vom Mere, Hans von Stecha und Hans Böticher, alle ratis gesworne der obgenanten stat Czwickaw, alle unser noch komenden rethe, dy gancze gemeyne, arm und reich, bekennen und tun kunt mit disem offem unserm briff allen, dy in sehen oder hören lesen, daz wir mit gutem vorrathe unser eldisten und clügisten und der hantwergmeister und der ganczen gemeyne, arm und<sup>a)</sup> reich, recht und redlichen vorkoufft haben mit urkunde diczs brifs vorkouffen von unserm rathuse und von unser stat von allen czinsen und renthen, dy do zcugehoren, wo dy gelegen synd adir namen haben, dem ersamen prister herrn Niclas Symonis, iczunt eyn vorweser dez altars dez heiligen sende Johannis des teuffers, sende Johannis evangelisten und sende Selige und sende Mere, den man nennet dez Kyrzschers altar und allen synen noch kōmelingen vorweser dez genanten altars drey gute reynische guldin jerliches czinses. Den selbigen czinss haben wir dem genanten herrn Niclas Symonis und allen synen nochkōmelingen vorwesern<sup>b)</sup> dez genanten<sup>b)</sup>